



Тәуелсіздікке – тарту!

Тәуелсіздік мерекесі тұсында Ф.Мүсірепов атындағы Қазақ мемлекеттік академиялық балалар мен жасөспірімдер театрында алматылық үздік оқушыларды «Мәңгілік елдің Жас Ұландары» атты бірыңғай «Жас Ұлан» балалар мен жасөспірімдер ұйымы Республикалық қоғамдық бірлестігінің мүшелігіне салтанатты қабылдау мәдени-патриоттық іс-шарасы болып өтті. Шараны Алматы қаласы Білім басқармасының тапсырысы бойынша ұйымдастырған №7 Оқушылар үйі.

Бірыңғай «Жас Ұлан» балалар мен жасөспірімдер ұйымы Республикалық қоғамдық бірлестігінің мүшелігіне Алматы қаласының 8 ауданынан ең үздік 250 оқушы ант қабылдап, «Жас Ұлан» ұйымының қатарына өтті.

Патриот ұлдардың мойнына туымыз түстес көкшіл гаслуктерді республикаға танымал өнер иелері Ф.Мүсірепов атындағы Қазақ Мемлекеттік Академиялық балалар мен жасөспірімдер театрының көркемдік жетекшісі, Қазақстанның еңбек сіңірген қайраткері, Қазақстан Жастар Одағы сыйлығының лауреаты Ерлан Біләл, «Тамаша» ойын-сауық отауының әртісі, ҚР еңбегі сіңген қайраткері Кәдірбек Демесінов, ҚР еңбегі сіңген қайраткері, «Ерен еңбегі» үшін медалінің иегері Рақышев Сәкен Мамытқанұлы, Қазақстан Жастар Одағы сыйлығының және «Серпер» сыйлығының иегері, актриса Жантілеуова Аида Ізғалиқызы, Ақан Сатаевтың «Қарашаңырақ» фильміндегі Алтынайдың рөлін сомдаушы актриса Байбосынова Гүлбаһрам Ахатқызы және Алматы қаласы Білім Басқармасының рухани адамгершілік тәрбие және өзін-өзі тану бөлімінің басшысы Молдабаева Қатипа Қасқырқызы байлады.

Жасұландықтарды қуанышты сәтіммен құттықтаған өнер иелері өздерінің балалық шақтарынан естеліктер айтып, жастарды отаншыл болуға шақырды.

Шараны жүргізген №7 Оқушылар үйінің бұқаралық бөлім меңгерушісі Назерке Муталаяпова мен №59 мектеп-гимназияның 10-сынып оқушысы Арлан Исаев ел тәуелсіздігі жайында шежірелі деректерді көпшілікке тұщына жеткізді.

Тәңірім тілеуінді берді қазақ, Айырылма айбыныңнан енді қазақ. Тағдырым баспаған ғой маңдайыңа, Мәңгілік “бодан” деген мәрді қажап. “Тәуелсіздік күніне” шүкір дейік, Алланың қалауымен болдың азат, – деген жалынды жырларды нақышына келтіре оқыған Назерке Муталаяпованың сөзін іліп өкеткен Арлан Исаев:

Басты алға азат ел – анамыз,
Жол бастап Елбасы – данамыз.
Гүлденді кең-байтақ даламыз,
Түрленді сәнді сан қаламыз.
Елдікке, бірлікке сенеміз,
Ерлікке, тірлікке кенембіз.
Қажырмен қарыштап келеміз,
Болашақ бағына енеміз.
Басқарған Елбасы ұлы іс –
Басталған жаңаша құрылыс.
Баянды басталды бетбұрыс,
Оңғарған ер көсем құрып іс.
Жаңаша дарыған білімім,
Жарыса дамыған ғылымым.
Қазақтың өркенін өсірген
Азат күн – бақытым – Ұлы күн! – деп
жастардың рухын көтере түсті.

Алматы қаласы Білім Басқармасының рухани адамгершілік тәрбие және өзін-өзі тану бөлімінің басшысы Молдабаева Қатипа Қасқырқызы оқушыларды саяси маңызы зор ерекше күн – Жас Ұландар қатарына салтанатты түрде қабылдануларымен шын жүректен құттықтап, Жас Ұландар – ХХІ ғасыр көшбасшылары, жаңа, тұрақты, дамып келе жатқан еліміз Қазақстанның ертеңгі болашағы екенін айта келе, алдыңғы толқын ағаларының өнегелі өмірлерінен үлгі ала отырып, ата-бабаларымыздың еліміз бен кең байтақ жерімізді жаудан



қорғап, бізге бақытты өмір сыйлаған Ұлы ерліктерін ешқашан ұмытпау керектігін айтты.

Жасұландықтардың атынан №59 мектеп-гимназиясының оқушысы Исаев Арлан сөз сөйлеп, бүгінгі ерекше күн жасөспірімдердің есінде мәңгі сақталатындығын, өздері берген антқа адал болып, Егеменді еліміздің нағыз патриоттары болатындықтарын үлкен тебіреніспен айтты.

Жиын соңы жүздері бал-бұл жанған Жас Ұландардың мерекелік әнімен аяқталды.

Айнұр ДАУЛБАЕВА,
Алматы қаласы.

